

Ri nab'e carta xutz'ib'aj ri Pablo che ri Timoteo

Ri Pablo kuya pan rutzil uwach ri Timoteo

1 ¹Ri'in in Pablo, in taqo'n re ri Qanimajawal Jesucristo, intaqom lo rumá ri Dios Qakolob'enel y rumá ri Qanimajawal Jesucristo, ri qakub'am pana qak'u'x ruk'.
²Kantz'ib'aj pan wa' wa carta chawe ri'at Timoteo, ri paqatzij wi at nuk'ajol chupa rub'i' ri Cristo* ma wuma ri'in xakoj rub'i' Rire. Chak'ulu k'u ri unimal rutzil k'u'xaj, ri relej k'u'xaj y ri utzil chomal re ri Qaqaw Dios y re ri Qanimajawal Jesucristo.

Pixab'anik puwi taq ri k'utunik na ub'e taj

³K'una chak'u'x ri ximb'i'ij kan chawe echiri' e ri' kin'ek Macedonia: E katkanaj kan chupa ri tinamit Éfeso ma chirí' e k'o jujun tikawex lik junwi ri kakik'utu chwa ri kaqak'ut ri'oj. Ximb'i'ij k'u kan chawe keb'ataq che na kaki'an ta chi wa'!
⁴Yey ximb'i'ij kan chawe kab'i'ij chike ri hermanos makiya ne kina'oj puwi taq ojer tzijob'al na petinaq ta ruk' ri Dios y taq ri kakib'olej kib'i' katí'-kimam re ojertan, ma taq la' kuk'am lo sachib'al na'oj y na kato'b' ta che ri karaj ku'an ri Dios quk', yey wa' ku'ana xew rumá ri kub'ulib'al qak'u'x ruk' Rire.

⁵Ruk'u'xib'al ri kojutaq ri Dios che e wa': Lik k'ax kaqana' qib' chiqawach.^a Yey cha' kaqa'an wa' chirajawaxik lik kalax pa qanima' kaqa'an ri utz, kaqamaj usuk' sa' ri utz yey e kaqa'ano, y paqatzij wi kakub'i' qak'u'x ruk' Rire.

⁶No'j e k'o jujun kiya'om kan ri karaj ri Dios; xkijalk'atij k'u ri kina'oj y wo'ora xew kech'a't chwi ri na jinta uchak. ⁷Rike kakaj kaki'an e aj k'utunel che kib' chwi Rutzij Upixab' ri Dios, tob' na kakimaj tane usuk' ri kakib'i'ij y na kakimaj tane usuk' ri k'utunik lik kakijikib'a' uwach.

^a 1:5 Ro. 13:8-10; Gl. 5:14

⁸Pero ri'oj lik qeta'am lik k'o kutiqoj Rutzij Upixab' ri Dios we jusuk' kaqachapab'ej. ⁹Qeta'am k'ut ri Tzij Pixab' na xya'i' taj re kuq'at tzij pakiwi ri jusuk' kib'inik kisilab'ik; ma xya'ik re kuq'at tzij pakiwi ri e aj palajiy tzij y ri na e ta kojol tzij, ri na jinta xi'in ib' kuk' chwach ri Dios y ri e aj makib', ri na keb'ok ta il che kakiloq'nimaj uq'ij ri Dios y ri kakik'aq b'l uq'ij ri Dios; ri e kamisay kichu-kiqaw kuk' ri e kamisanel, ¹⁰ri kaketz'ab'ej uwa kiq'ij kuk' jujun chik na kik'ulel taj, rachijab' kaki'an kik'ulel chike kach achijab', ri kekichap winaq y na kekitzoqopij ta uloq we na kaya'i' ta puaq chike, raj raq'ul, ri k'o kakijikib'a' uwach chupa rub'i' ri Dios yey xa raq'ub'al ri kaki'ano, kuk' taq k'u konoje ri kakipalajij ri saqil k'utunik re ri Dios. ¹¹E k'utunik wa' k'o chupa ri chomilaj Utzilaj Tzij re ri Dios. Yey ri Dios, ri lik nim uq'ij, e xya'w wa' panuq'ab' ri'in cha' kantzijoj.

Ri Pablo kutioxij ri rutzil uk'u'x ri Dios

¹²Ri'in kantioxij che ri Qanimajawal Jesucristo ma uya'om nuchuq'ab' cha' kan'an ruchak y ma xkub'i' uk'u'x wuk' echiri' xuya wa jun chak chwe, ¹³tob' rojertan ri'in lik xinmakun chirij ri Qanimajawal Jesucristo ma xeb'enuternab'ej ri kikojom rub'i' y lik xeb'enuya pa taq k'axk'ob'ik. Na ruk' ta k'u ri', ri Dios xjuch' ka'n uk'u'x chwe; ma echiri' xin'an wa', k'amaja' kakub'i' nuk'u'x ruk' ri Cristo y na xinmaj ta k'u usuk' we ri kan'ano na utz taj. ¹⁴Yey ri Qanimajawal lik xuk'ut ri unimal rutzil uk'u'x chwe y xuya chwe kakub'i' nuk'u'x ruk' y xuya chwe kank'ut ri rutzil uk'u'x Rire; y wa' xew ri Qanimajawal Jesucristo kaya'w re.

¹⁵Ek'u wa kamb'i'ij lik qatzij y lik taqal che kakikoj konoje ri tikawex: Ri Qanimajawal Jesucristo xk'un che ruwachulew cha' keb'olu'kolob'ej konoje raj makib!. Ek'u ri'in in jun chike wa'; yey chinuwach ri'in, in ne ri más k'o numak chikiwa rike. ¹⁶Ek'u ri Qanimajawal Jesucristo xuk'ut ri k'axna'b'al uk'u'x chwe ri'in ma xukuy numak tob' lik in aj mak. Jela! xu'ano cha' kaq'alajin ri rutzil uk'u'x chike konoje ri kekojow rub'i!. Ma ri xu'an wuk' ri'in e k'utub'al re ri ku'an kuk' ri kakub'i' kik'u'x ruk' Rire, kukuy k'u kimak y kuya kik'aslemal na jinta utaqexik.

¹⁷Ruma k'u wa', qalooq'nimaj uq'ij ri Dios waq'ij ora y chiqawach apanoq.

Ma ri Dios Qajawxel
 na jinta utaqexik rutaqanik,
 na jinta utaqexik ruk'aslema,
 na kilitaj ta uwach,
 xew Rire e Dios
 y reta'am ronoje.

Lik k'o yakb'al uq'ij y unimal uchomalil.

¹⁸ Wo'ora Timoteo, kanya wa taqanik chawe ri'at at nuk'ajol chupa rub'i' ri Cristo: Chachuq'ub'ej awib' chupa ri chak ya'om paq'ab' e chirij ri xq'alajisax pawi' ri'at chwi rachak chwach ri Dios.^b ¹⁹ Chatikib'a' k'u ri kub'ulib'al ak'u'x ruk' ri Cristo y chamaja usuk' sa' ri utz y e cha'ana ri'. Ma e k'o jujun na xki'an ta wa', y ruma k'u ri' xsach ri kub'ulib'al kik'u'x ruk' ri Cristo y na kakikoj ta chi ne ri Q'ijsaq. ²⁰ Jenewa' xki'an ri Himeneo y ri Alejandro. Ruma k'u ri', xeb'enuya puq'ab' ri Satanás* cha' kakitij k'ax y jela' kakimaj usuk' na utz taj kech'a't chirij ri Q'ijsaq re ri Dios.

Pixab'anik chwi ri oración

2 ¹Kantz'onoj k'u chawe chab'il'ij wa' che rutinamit ri Dios:
² Lik chirajawaxik wi kaqa'an orar chwach ri Dios. Echiri' kojch'a't ruk', e chojelaj chwach Rire pakiwi konoje ri tikawex cha' kuya chike ri lik kajawax che ri kib'inik kisilab'ik, yey qatioxij ronoje che. ³Qa'ana orar pakiwi taq ri e taqanelab' y pakiwi konoje taq ri e aj wach che ruwachulew cha' jela' utz koj-jeqi' chi utzil chomal y kojb'in jusuk' ruk' jun saqil b'inik silab'ik chwach ri Dios. ⁴Lik k'u qa'ana orar ma wa' e lik utz y e kuk'ul uk'u'x ri Dios Qakolob'enel, ⁵ma ri karaj Rire e kekolob'etaj konoje ri tikawex y kaketa'maj chi utz ri Q'ijsaq. ⁵Ma xa jun ri Dios k'olik yey xa jun ri k'o puq'ab' kach'aw paqawi' chwach ri Dios; wa' e ri Qanimajawal Jesucristo, Ralaxel Chikixo'l Tikawex. ⁶Rire xuya rib' pa kamik quma ri'oj oj tikawex cha' kutoj ri qamak y kojresaj puq'ab' Ritzel; yey wa' xq'alajisax pa ruq'ijol uch'ob'om chi lo ri Dios. ⁷E ruma wa', ri'in in cha'tal lo ruma ri Dios re kantzijoj ri Utzilaj Tzij y kinu'an k'u in taqo'n yey in k'utunel chikiwach ri na e ta aj Israel cha' jela' kakub'il' kik'u'x rike ruk' ri Cristo* y kakikoj ri Q'ijsaq. Lik qatzij wa kamb'il'ij che alaq, ma in re ri Cristo y na kan'an ta raq'ub'al.

^b 1:18 1Ti. 4:14

⁸Ri kuaj ri'in e konoje taq rachijab', tob' pa e k'o wi, xaqi ki'ana orar chwach ri Dios. Yey echiri' kakiyak k'u ri kiq'ab' re kaki'an orar, ri lik chirajawaxik wi e jusuk' ri kib'inik kisilab'ik, na jinta oyowal pa kanima' y na kech'ojin ta chikiwach.

Pixab'anik chwi ri saqil kib'inik rixoqib'

⁹Ri nupixab'anik chike taq rixoqib' e kiwiqa kib' chi usuk'likil. Makik'ut k'u ri kicuerpo yey makiwiq kib' xa re yakb'al kiq'ij. Ma ̄sa' ri ku'an chom che rixoq? ̄E nawi ri wiqital ruk' oro y ruk' perlas*? ̄E nawi uchomalil la' ri kiwiqib'al? Na e taj, ¹⁰ma ri kichomalil e ri chomilaj chak kaki'an chwach ri Dios, jela' pacha' ri taqal chike rixoqib' kakiloq'nimaj uq'ij Rire.

¹¹Echiri' kak'ut Rutzij Upixab' ri Dios chikiwach rixoqib', lik chirajawaxik rike xew kakito y makik'ul uwach. ¹²Ri'in na kanya ta luwar chike rixoqib' keb'u'an e aj k'utunel chikiwach rachijab' o ketaqan pakiwi'; ma ri lik ub'e e xa kakito. ¹³Ma ri Dios nab'e e xu'an ri Adán, tek'uchiri' xu'an ri Eva. ¹⁴Yey na e ta ri Adán ri xsokotaj nab'e rumা ritzel, e ri Eva; y echiri' xsokotajik, e xupalajij rutzij ri Dios. ¹⁵Na ruk' ta k'u ri', ri Dios keb'ukolob'ej rixoqib' y kuya kalk'o'al cha' kekik'iyyasaj. Kekolob'etaj k'u ri' we ketiki' chi utz ruk' ri kub'ulib'al kik'u'x, ri rutzil kik'u'x y ri santowilaj kib'inik.

Pixab'anik puwi ri kib'inik kisilab'ik raj k'amal kiwach rutinamit ri Dios

3 ¹Lik usuk' wa kamb'i'ij: We k'o junoq lik karaj ku'an aj k'amal kiwach rutinamit ri Dios, ri' lik chomilaj chak ri kurayij. ²Pero lik chirajawaxik che juna aj k'amal kiwach rutinamit ri Dios e jusuk' rub'inik usilab'ik cha' na jinta k'o kach'a'tib'en re. E k'ola jusuk' ruk' ri rixoqil, lik chuch'ob'o chi utz ri ku'ano, chuchajij rib' chirib'il rib' cha' na katzaq ta pa mak y chom kilitaj rub'inik kuma ri jujun chik. Xaqi cheb'uk'ulu chi utz taq ri keb'opon chirocho, y k'ola una'oj che uk'utik Rutzij Upixab' ri Dios. ³Lik chirajawaxik che na q'ab'a'rel taj, na aj ch'a'oj taj, na rayinel ta re puaq kach'ak ruk' sokoso'nik, na ke'ek ta uk'u'x ruk' ri puaq; ma ri chirajawaxik wi e lik utz uk'u'x y ch'u'ch'uj uk'u'x. ⁴Chu'ana ri saqil taqanik pa rocho; chuk'utu k'u chike ri ralk'o'al

cha' keb'u'an e kojol tzij y jek'ula' kek'oji' chi jusuk!. ⁵ Ma e ri na kuriq ta ku'an saql taqanik pa rocho, ¿su'anik k'u ri' keb'uchajij chi utz rutinamit ri Dios?

⁶ Na utz taj we k'o junq k'ak' ukojom ri Utzilaj Tzij yej kakojik aj wach chupa riglesia, ma k'axtaj ku'an nim che rib' y kaq'at k'u tzij puwi' jela' pacha' ri xuk'ulumaj ritzel winaq rumu xu'an nim che rib!. ^c ⁷Ri lik chirajawaxik wi e chom rub'inik usilab'ik chikiwach taq ri na kikojom ta rub'i' ri Qanimajawal Jesucristo, cha' na jinta junq kak'aqaw b'i uq'ij y na katzaq ta chupa juna pajtajib'al re ritzel winaq.

**Pixab'anik puwi ri kib'inik kisilab'ik
raj chakib' e to'b'el piglesia**

⁸ Jek'ula' raj chakib' e to'b'el piglesia lik chirajawaxik chike e jusuk' ri kib'inik kisilab'ik, na xa ta keb' kipalaj, na e ta q'ab'a'relab', na e ta rayinel re puaq kach'ak ruk' sokoso'nik. ⁹Chirajawaxik kakitaqeji ri saql k'utunik uq'alajisam ri Dios yej kakina' pa kanima' utz ki'anom chwach Rire. ¹⁰Nab'e na chirajawaxik kak'am kipa cha' kaq'alajinik we lik jusuk' ri kib'inik kisilab'ik; tek'uchiri' utz keb'u'an aj chakib' e to'b'el piglesia.

¹¹ Jek'ula', chirajawaxik chike rixoqib' e jusuk' ri kib'inik kisilab'ik, na e ta aj molot, lik kakich'ob' chi utz ri kaki'ano y kaki'an chi utz ronoje ri taqal chike.

¹² Ek'u rachi aj chak to'b'el piglesia, lik chirajawaxik k'ola jusuk' ruk' ri rixoqil y chu'ana saql taqanik pakiwi taq ri ralk'o'al y pakiwi konoje taq ri e k'o pa ri rocho. ¹³We ku'an k'u chi utz ruchak, katak'ab'ax uq'ij chikiwach ri tikawex y kanimar uk'u'x che uq'alajisaxik ri kub'ulib'al uk'u'x ruk' ri Qanimajawal Jesucristo.

**Ruk'u'xib'al ri Utzilaj Tzij
puwi ri Qanimajawal Jesucristo**

¹⁴ Ri'in lik nukub'am pan nuk'u'x ki'nwila tan awach Timoteo, pero kantz'ib'aj na pan wa' chawé ¹⁵cha' we xinmayin che awilik, chaweta'maj sa' ri saql b'inik silab'ik chirajawaxik chike ri e re ri Dios; ma rike e utinamit ri Dios k'aslik yej rutinamit e chapayom re y e katikib'an re

^c 3:6 Is. 14:12-14

ri Q'ijsaq. ¹⁶Paqatzij wi lik nim uq'ij ri Q'ijsaq re ri Dios q'alajisam chiqawach:

E ri Qanimajawal Jesucristo xu'an tikawex
echiri' xk'un che ruwachulew.

Ronoje ri xu'ano y ri xub'i'ij e lik jusuk'
y ri Ruxlab'ixel ri Dios e xq'alajisan re wa!.^d
Xilitaj kuma ri ángeles.

Xtzijox rub'i' chike ruk'iyal kiwach taq ri tikawex che
ruwachulew
y e k'i ri xkikoj rub'i'.
Yey xk'ul tanchi chila' chikaj ruk' yakb'al uq'ij.

Taq ri kakesaj kib' chirij ri Q'ijsaq

4 ¹Ri Ruxlab'ixel ri Dios uq'alajisam chi utz kopon na
ruq'ijol echiri' e k'o jujun tikawex kakiya kan ri Q'ijsaq
re ri Dios cha' kakitaqej k'utunik petinaq kuk' taq ri itzel
uxlab'ixel e sokoso'nel. ²Rike e kekitaqej ri winaq xa keb'
kipalaj y e aj raq'ul, ri lik u'anom chi ach'i'y ri kina'oj. ³Wa'
e ri kekitaq taq ri winaq cha' na kek'uli' taj y cha' na kakitij
ta jujun wa'im tob' wa' e ri Dios xu'ano re katijik; ek'u ri'oj, ri
qeta'am y qakojom ri Q'ijsaq, utz kaqak'ul wa' ruk' tioxib'al.
⁴Ma ronoje ri 'anatal rumá ri Dios, lik chom; na utz ta k'u
ri' we kaqak'aq b'l uq'ij ri kuya ri Dios chiqe. Ri qa'aná'e
qak'ulu ruk' tioxib'al. ⁵Ma Ruch'a'tem ri Dios kub'i'ij ronoje ri
kuya Rire chiqe lik chom;^e yey echiri' kaqatioxij wa' chwach
ri Dios, koju'an xa oj jun ruk' Rire che ub'i'xikil: Ronoje lik
chom.

Jun utzilaj aj chak re ri Qanimajawal Jesucristo

⁶We ri'at kak'ut chike rutinamit ri Dios wa kantz'ib'aj pan
chawe, ri' katu'ana jun utzilaj aj chak re ri Qanimajawal
Jesucristo; ma wa Utzilaj Tzij aqojom y ri saqil k'utunik
ataqem e kaya'w achuq'ab' chwach ri Dios. ⁷Matok k'u il che
taq ri ojer tzijob'al na ruk' ta ri Dios petinaq wi, ma wa' xa
no'jib'al ke winaq.^f E chatijoj awib' che jun saqil b'inik silab'ik
chwach ri Dios. ⁸Ma we kaqatij uq'ij kak'oji' uchuq'ab' ri
qacuerpo, utz k'u ri'; pero wa' xa joq'otaj kojuto'o. No'j we e
kaqaya qib' che jun saqil b'inik silab'ik chwach ri Dios, wa'

^d 3:16 Ro. 1:4 ^e 4:5 Gn. 1:31; Mr. 7:19 ^f 4:7 1Ti. 1:4

lik utz che ronoje, ma k'o kutiqoj che ri qak'aslemal waq'ij ora y chiqawach apanoq. ⁹Wa kamb'i'ij lik qatzij y lik taqal che kakikoj konoje ri tikawex. ¹⁰Ruma k'u wa' kojchakunik y kaqatij taq k'axk'ob'ik, ma kub'ul pan qak'u'x ruk' ri Dios k'aslik, ri kakolob'en ke taq ri tikawex che ruwachulew; y paqatzij wi, e keb'ukolob'ej konoje ri kakub'i! kik'u'x ruk' ri Cristo*. ¹¹Janipa k'u ri nub'i'im chawe, e chak'utu ri' chikiwach ri kikojom rub'i! ri Cristo y chab'i'ij chike e lik kakitaqeja! wa'!

¹²Maya luwar che junqoq kuk'aq b'i aq'ij ruma k'a at ala. E chak'utu ri lik ub'e chikiwach ri kikojom rub'i! ri Cristo, yej cha'ana wa' ruk' rach'a'tem, ruk' rab'inik asilab'ik, ruk' ri rutzil ak'u'x, ruk' ri kub'ulib'al ak'u'x y ruk' ri saqil ana'oq. ¹³Xaloq' k'u k'amaja' kinoponik, e chaya'a awib' che rajilaxik Ruch'a'tem ri Dios y che u'anik pixab'anik y k'utunik chikiwach riglesia. ¹⁴Mawoq'otaj uya'ik ri ya'tal chawe ruma ri Dios, ri xq'alajisax pawi' ri'at echiri' ri e aj wach re riglesia xkiya ri kiq'ab' pawi!. ¹⁵Chaya'a k'u awib' che taq wa!: Cha'ana janipa ri amajom chik cha' jela' konoje kakilo jalan utz ri chak kat-tajin che u'anik. ¹⁶Lik chachajij awib' che rab'inik asilab'ik y che uk'utik ri saqil k'utunik. Chachuq'ub'ej awib' che u'anik taq wa!, ma jela' ri'at y ri ketaw awe kixkolob'etaj che ri q'atb'al tzij re ri Dios.

Ru'anik ka'an pixab'anik chikiwach rutinamit ri Dios

5 ¹Echiri' ka'an pixab'anik, mayaj jun achi nimalaj winaq chik; ri cha'ana e chapixab'aj pacha' chi aqaw; yej cheb'apixab'aj ralab'o pacha' chi e awatz o e achaq! ²y rixoqib' e nimaq winaq pacha' chi e achu. Yey ruk' saqil ana'oq cheb'apixab'aj ralito pacha' chi e awanab!.

Ru'anik keto' rixoqib' e malka'nib'

³Taq rixoqib' e malka'nib', ri paqatzij wi na jinta kato'w ke, chirajawaxik wi keto' ruma rutinamit ri Dios. ⁴No'j we k'o junia ixoq malka'n yej e k'o ralk'o'al o e k'o taq umam, ri' e rike ri lik chirajawaxik kekichajij chi utz ri kifamilia y kekito' ri kichu malka'nib' o ri kat'i malka'nib', ma wa' e pacha' rajil uk'axel chike ri xek'iyan ke, yej wa' e lik utz y e kuk'ul uk'u'x ri Dios. ⁵No'j chirajawaxik k'ut e riglesia kato'w ke rixoqib' e malka'nib', ri paqatzij wi na jinta chi kifamilia y

na jinta k'u junq kato'w ke, yey wa' e taq ri lik kikub'am pan kik'u'x ruk' ri Dios y lik kiya'om kib' che u'anik orar chipaq'ij chichaq'ab!. ⁶No'j e juna ixoq malka'n we xew e ke'ek uk'u'x che u'anik ri karaj rire, ri' pacha' kaminaq chi chwach ri Dios tob' ne k'aslik, y na taqal ta k'u ri' che kato'ik. ⁷E cheb'ataqa k'u riglesia che u'anik taq wa kamb'i'ij chawe cha' chom kilitaj ri kib'nik kisilab'ik chirajawaxik ri jujun chik. ⁸Lik k'u chirajawaxik ri' che junq keb'uto' taq ri ratz-uchaq' e k'o chux che, y más ne chirajawaxik ku'an wa' chike rufamilia.^g Ma e junq na ku'an ta wa', ri' na taqal ta che kub'i'ij e kuk'il ri e re ri Cristo*, yey más ne k'o umak ri' chikiwa ri na kikojom ta rub'i' ri Cristo, ma e ne rike kekichajij ri kifamilias.

⁹Chupa ri wuj pa tz'ib'ital wi taq ri b'il'aj ke rixoqib' e malka'nib' keto'ik, xew katz'ib'ax rub'i' rixoq uk'isom chi sesenta junab!, we jusuk' xk'oji' ruk' ri rachijil, ¹⁰we chom ruch'a'tib'exik ka'an chwi taq ri chak u'anom, wa' e eb'uk'iyisam chi utz ri ralk'o'al, eb'uk'ulum chi utz ri hermanos keb'opon chirocho y uch'ajom ne ri kaqan,^h eb'uto'om taq ri e k'o pa k'axk'ob'ik y lik k'u u'anom utzilaj taq chak.

¹¹No'j taq ri malka'nib' k'a e k'ak'al, matz'ib'ax ri kib'i' ma k'axtaj ruma ri kirayib'al xew kakitzukuj kek'uli' tanchik y kakesaj k'u kib' chirij ri Cristo. ¹²Jek'ula' e kakeqejej ri q'atb'al tzij pakiwi' ruma na xki'an taj janipa ri kib'i'im kaki'ano.ⁱ ¹³Keb'u'an k'u e xepu'ab' y xaqi keq'e'kot chi'taq ja. Yey na xew ta keb'u'an e xepu'ab', ma keb'u'an ne e aj molot, xaqi kakimin kib' che ri na jinta ke che y e xaqi kakitzijoj ri na taqal ta chike kakib'i'ij. ¹⁴E uwari'che ri'in kamb'i'ij chike ri e malka'nib' k'a e k'ak'al, chek'uli'oq, chekik'iyisaj ri kalk'o'al y e kila' k'ut janipa ri chirajawaxik ka'an pa kocho cha' jela' ri tzel keb'ilow re ri Cristo na jinta k'o kakich'a'tib'ej chikij rutinamit Rire. ¹⁵Ma e k'o ne jujun chike wa' wa malka'nib' na kitaqem ta chi ri Cristo, ma e kitaqem ri Satanás*.

^g 5:8 Éx. 20:12 ^h 5:10 “Uch'ajom ne ri kaqan”: Ojertan kaki'an wa' ruma rulew kok che ri kaqan pa b'e. ⁱ 5:12 “Janipa ri kib'i'im kaki'ano”: Ri malka'nib' xeto' ruma riglesia, xki'an jun tzij na kek'uli' taj y kakiya k'u kib' chupa ruchak ri Dios piglesia.

16 We k'o junq ukojom rub'i' ri Cristo ye y e k'o ixoqib' malka'nib' chike rufamilia, ri' chirajawaxik che cheb'uto'o' cha' na kuya ta alk'ayew che riglesia, y jek'ula' riglesia xew keb'uto' ri malka'nib' paqatzij wi na jinta kato'w ke.

Pixab'anik pakiwi ri e aj wach re riglesia

17 Chike konoje ri e aj wach re riglesia, ri kik'amom uwach chi utz rutinamit ri Dios, chirajawaxik ka'an kuk' janipa ri taqal chike rumá ri chak kaki'ano; y e ne más chirajawaxik ka'an wa' kuk' ri ya'tal pakiq'ab' ketzijonik y kek'utunik. **18** Ma jawa' tz'ib'ital kan chupa Rutzij Upixab' ri Dios: «Makoj b'ozal che ri b'oyex echiri' kuqil uwi ri trigo, ma taqal che katzuqik.»^j Y kub'i'ij: «E junq kachakunik, lik taqal che katojik.»^k

19 Echiri' k'o junq kutz'aq uchi' juná aj wach re riglesia; makoj ne wa' we na e jinta ka'ib'oq o oxib'oq kakijikib'a' uwach rumak. **20** We k'o juná aj wach re riglesia na karaj taj karoq'otaj kan rumak, chach'a'b'ej upa chikiwach konoje cha' jela' kok xi'in ib' kuk' riglesia. **21** Chwach k'u ri Dios y chwach ri Qanimajawal Jesucristo y chikiwach ri ángeles re ri Dios ri echa'talik re kakiloq'nimaj Rire, kamb'i'ij k'u chawe cha'ana taq wa' chi jusuk' kuk' konoje tob' e chinoq y na xa ta katcha'wik. **22** Ma'an tan aj wach re riglesia che junq^l we k'amaja' awilom chi utz ri jusuk' ub'inik,^m ma amak k'u ri' ri'at we rire ku'an ri na utz taj chupa ri chak re ri Dios. Lik chachajij k'u awib' ri'at chwach ronoje ri na utz taj.

23 Ruma k'u lik kuya k'ax pamaj chawe, matij xew jorona', utz we e kach'urij k'ana vino ruk' ri jorona' katijo.

24 Lik chirajawaxik kaweta'maj chi utz rub'linik usilab'ik china ri kakojo re aj wach re riglesia. Ma e k'o jujun achijab' lik q'alaj ri kimak tob' k'amaja' ne kaq'at tzij pakiwi'; pero e k'o jujun chik k'unaj kaq'alajin ri kimak. **25** Jek'uri'la', e k'o ri lik kaq'alajin ri chomilaj chak kaki'ano; pero e k'o jujun chik kaki'an chomilaj taq chak, ye y wa' kamayin reta'maxik. Na ruk' ta k'u ri', kopon ri q'ij kel lo chi saq.

^j 5:18 Dt. 25:4 ^k 5:18 Jer. 22:13; Lc. 10:7; 1Co. 9:14 ^l 5:22 Pa ri ch'a'tem griego kub'i'ij: "Maya tan raq'ab' puwi junq". 1Ti. 4:14

^m 5:22 1Ti. 3:6,10

Pixab'anik chike raj chak e k'o pakiq'ab' kipatrón

6 ¹Konoje raj chak e k'o puq'ab' junta patrónⁿ e lik kiloq'oj uq'ij ri kipatrón che ronoje ri kaki'ano, cha' jela' na jinta junoq tzel kach'a't chirij rub'i' ri Dios y chirij ri saqil k'utunik. ²Yey we junta aj chak k'o upatrón ukojom chi rub'i' ri Cristo*, much'ob'o: «Na chirajawaxik taj kan'an ri karaj ri nupatrón ma junam qawach qachaq' qib' chwach ri Dios.» Na ub'e taj kuch'ob' raqan wa'; ri lik usuk' e chu'ana más chi utz ruchak ma ri kunimaj e jun ukojom rub'i' ri Cristo y taqal k'u ri' che k'ax kana'ik. Wa' e k'utunik y pixab'anik cha'ana ri'at chike ri e aj chak.

Taq ri ke'ek kik'u'x ruk' ri b'eyomal xa re ruwachulew

³We k'o junoq junwi ri kuk'utu y na junam ta runa'oj ruk' ri saqil k'utunik re ri Qanimajawal Jesucristo y ruk' ri saqil b'inik chwach ri Dios, ⁴ri' na jinta reta'am tob' kuch'ob'o lik k'o una'oj. E ne lik ke'ek una'oj chwi taq ch'a'tem na jinta uchak, xa re sachib'al na'oj. Y taq wa' kuk'am lo retzelal k'u'x, ch'a'oj, k'axlaj ch'a'tem chikij jujun chik y na'oj na ub'e taj chikij jujun chik. ⁵Ruma k'u wa', e taq ri winaq sachinaq kina'oj y na jinta ri Q'ijsaq kuk', xaqi kakitzukuj ch'a'oj chikiwach. Rike kakich'ob'o, ri k'aslema chwach ri Dios e re ku'an b'eyomab' chike. Ma'an k'u awe'at kuk'!

⁶Paqatzij wi lik k'o kutiqoj ri qak'aslema chwach ri Dios, pero xew we kojki'kot ruk' ri k'o quk!. ⁷Ma na jinta quk'a'am loq echiri' kojalax wara che ruwachulew y paqatzij wi na jinta kaqak'am b'i echiri' kojkamik. ⁸E uwari'che we k'o qawa y k'o qaq'u', e chojki'kota ruk' wa!. ⁹No'lj taq ri lik kakirayij keb'u'an e b'eyomab', ri' lik na k'ayew ta chike ketzaq puq'ab' ritzel y kechapataj ruma uk'iyal rayinik na jinta uchak. Yey wa' xew kuk'am lo uk'iyal k'axk'ob'ik pakiwi rike wo'ora y chiqawach apanoq. ¹⁰Ma ri rayinik re ri puaq e kuk'am lo uk'iyal taq mak. E k'o ne jujun lik e b'enaq kik'u'x ruk' ri puaq y ruma wa' kiya'om kan ri kub'ulib'al kik'u'x ruk' ri Cristo, y jek'ula' kitukel kiya'om kib' pa k'axk'ob'ik.

ⁿ 6:1 “Raj chak e k'o puq'ab' junta patrón”: Kil “esclavo” pa vocabulario.

Pixab'anik che ri Timoteo

¹¹No'j ri'at Timoteo, at jun raj chak ri Dios, chatanimaja k'u chwach ronoje taq ri na utz taj. E chatijoj awib' che u'anik ri jusuk' y ri utz chwach ri Dios, kub'ula ak'u'x ruk', chak'utu ri rutzil k'u'xaj, k'ola unimal k'u'xaj awuk' y cha'ana ch'uti'n che awib'. ¹²Chachuq'ub'ej awib' chi utz chupa ri Utzilaj Tzij akojom y e chatok il che ri k'aslemal na jinta utaqexik, ma ruma wa' xatusik'ij ri Dios y ruma wa' chikiwach uk'iyal tikawex xaq'alajisaj ri kub'ulib'al ak'u'x ruk' ri Cristo. ¹³Chupa k'u rub'i' ri Dios, ri aj ya'l k'aslemal che ronoje taq ri k'olik, y chupa rub'i' ri Qanimajawal Jesucristo, ri na xuxi'ij ta rib' che uq'alajisaxik ri Q'ijsaq echiri' k'o chwach ri aj q'atal tzij Poncio Pilato,^o katintaq che wa': ¹⁴Cha'ana k'u chi jusuk' janipa ri katutaq ri Dios che cha' na jinta k'ana mak kariqitaj chawe echiri' kak'un tanchi lo ri Qanimajawal Jesucristo.

¹⁵Kak'un k'u ri Jesús chupa ri q'ij cha'tal chi lo ruma ri Dios.

Lik nim uq'ij ri Dios Qajawxel,
 ri k'o ronoje taqanik puq'ab',
 ri Taqanel pakiwi konoje ri taqanelab',
 ri Kajawal ke konoje ri e aj wach.

¹⁶Xew Rire na jinta jeqeb'al re y na jinta k'isb'al re,
 ma ruk'aslemal na jinta utaqexik.
 Rire jeqel pa Q'ijsaq y ruma ruwonib'al na jinta junoq
 kaqib' ruk'.
 Na jinta juna tikawex iliyom uwach y na jinta junoq
 kach'ijow rilik uwach.
 Xew k'u che Rire lik taqalik kayak uq'ij
 y xew puq'ab' Rire k'o wi ku'an taqanik na jinta utaqexik.
 iAmén*!

¹⁷Chab'i'ij k'u chike konoje taq ri b'eyomab' che
 ruwachulew maki'an nim che kib', makub'i' kik'u'x ruk'
 ri kib'eyomal ma wa' xa kak'isik; e kub'ula kik'u'x ruk'
 ri Dios k'aslik, ri kaya'w re ronoje ri kajawax chiqe cha'
 kojki'kot ruk'. ¹⁸Cheb'ataqa che ki'ana ri utz cha' jela' kak'oji'
 kib'eyomalil chwach ri Dios. Ki'ana k'u uk'iyal chomilaj taq
 chak, chesipanoq y chekito'o ri na jinta k'o kuk!. ¹⁹Jek'ula' ri'

^o 6:13 Jn. 18:37; 19:10-11

e ketajin che uk'olik chila' chikaj ri b'eyomalil na kak'is taj,
yey lik jikil uwach kakik'ul wa' chiqawach apanoq y kakiriq
kik'aslemal na jinta utaqexik.

K'isb'al uch'a'tem ri Pablo che ri Timoteo

²⁰Timoteo, chachajij chi utz janipa ri ya'tal paq'ab'; maya axikin che taq ch'a'tem na jinta k'o kutiqoj che rab'inik asilab'ik chwach ri Dios y maya axikin che k'utunik kab'l'i'x che lik kuya na'oj tob' na e ta k'u ri!. ²¹Ma e k'o jujun ruma kikojom taq wa!, e xkiya kan ri b'e re ri Q'ijsaq.

Chik'ulu iwonoje ri'ix ri unimal rutzil uk'u'x ri Dios. Amén.